

## **Agong Seru Masyarakat Islam Bersatu Hati Hadapi Musuh**

**Bernama**

**Jun 16, 2014**

KUALA LUMPUR, 16 Jun (Bernama) -- Yang di-Pertuan Agong Tuanku Abdul Halim Mu'adzam Shah hari ini bertitah masyarakat Islam perlu bersatu hati dan bersepakat dalam menghadapi musuh Islam yang sentiasa mencari jalan untuk menghancurkan agama suci itu.

Ketika merasmikan Tilawah dan Menghafaz Al-Quran Peringkat Antarabangsa ke-56, baginda bertitah selagi kesatuan umat tidak mampu dicapai, maka selagi itulah kejayaan yang dijanjikan Allah akan tertangguh.

Baginda bertitah Al-Quran telah menyatakan bahawa Allah tidak akan mengubah nasib sesuatu bangsa kecuali mereka berusaha mengubah segala kepincangan dalam diri mereka sendiri.

"Justeru itu, Beta sekali lagi menyeru ayuhlah kita bersatu padu. Umat Islam pasti kembali utuh dan mampu menghadapi segala rintangan serta ancaman musuh.

"Hindarilah permusuhan dalam masyarakat. Bangunlah mereka yang masih lena dibuai kelekaan fatamorgana dunia dan kembali berpegang teguh kepada prinsip dan nilai-nilai Islam sejati bagi mengembalikan kesatuan umat," titah baginda.

Tuanku Abdul Halim turut menyeru masyarakat Islam agar kembali kepada ajaran Islam yang termaktub dalam Al-Quran dan Sunnah kerana Islam adalah agama rahmah alamiah, yang menjadikan umatnya memiliki sifat atau watak berimbang.

"Berimbang bermaksud seluruh pertimbangan negatif dan positif diberi perhatian supaya jalan berfikir yang diambil selalu bersifat wasatiyyah," titah baginda.

Baginda juga meminta masyarakat Islam mengambil iktibar kejatuhan Kerajaan Saba' yang sombong, angkuh, kufur nikmat kemewahan pemberian Allah serta menyekutukan Allah dengan menyembah matahari dan bintang.

"Kisah Kerajaan Saba' ini benar-benar memberi pengajaran dan iktibar akibat mengkufuri nikmat kurniaan Allah dengan sikap terlalu tamak, mengejar keduniaan

sehingga menjadikan mereka sombong dengan kemewahan dunia, ingkar, enggan bertaubat serta taksud dengan keduniaan," titah baginda.

Baginda bertitah sikap Kerajaan Saba' telah menghancurkan masyarakatnya sekelip mata dengan ujian Allah yang menurunkan banjir besar.

Terdahulu, keberangkatan tiba Tuanku Abdul Halim dan Raja Permaisuri Agong Tuanku Hajah Haminah disambut Perdana Menteri Datuk Seri Najib Tun Razak dan isteri Datin Seri Rosmah Mansor serta Menteri di Jabatan Perdana Menteri Datuk Seri Jamil Khir Baharom.

Majlis yang berlangsung lima hari bermula malam ini akan mendengar bacaan 68 peserta terdiri daripada 38 peserta kategori tilawah dan 30 bagi hafazan dari 52 negara.

Bagi kategori hafazan, Malaysia diwakili Mohd Ersyad Abdullah dan Norhaafizah Mohd Shafie, yang merupakan johan lelaki dan wanita 30 Juzuk Majlis Menghafaz Al-Quran Peringkat Kebangsaan ke-35 manakala bagi kategori tilawah, johan qari dan qariah Tilawah Al-Quran Peringkat Kebangsaan ke-57 iaitu Ahmad Tarmizi Ali dan Hanimzah Jalaluddin.

Sementara itu, Jamil Khir berkata johan qari dan qariah kategori tilawah bakal membawa pulang jongkong emas bernilai RM70,000 tajaan Yayasan Pembangunan Ekonomi Islam Malaysia (Yapeim), piala iringan dan wang tunai RM40,000 manakala bagi kategori hafazan, johan hafiz dan hafizah menerima wang tunai RM30,000 beserta cenderamata dan sijil penyertaan.

"Penganjuran tilawah antarabangsa kali ini bertemakan 'Wasatiyyah Tonggak Kesatuan Ummah' sebagai menzahirkan hasrat dan aspirasi negara melahirkan masyarakat sederhana, berimbang, adil, toleransi antara satu sama lain," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1046801>